

INUIT ATAQATIGIIT

Inatsisartuni



UKA2019/Imm. 211

07. november 2019

Mikivsuk Thomassen

Kalaallit qimmiata aammalu qimussersuartoqartneratalu qanoq ililluni kulturikkut piujuartinneqarsinnaaneri pillugit Naalakkersuisut misissueqqullugit peqquneqarnissaannik inatsisartut aalajangiiffigisassaatut siunnersuut. Susasaqartut peqatigalugit misissuineq ingerlanneqassaaq, misissuinerlu inatsisartunut agguaanneqarumaarluni.

(Inatsisartunut ilaasortaq Doris J. Jensen, Siumut)

Siullertut qujarusuppunga siunnersuuteqartumut.

Qimmit qimuttut pillugit siunnersumi takuneqarsinnaavoq qimmit qimuttut qanoq nunatsinni amerlatiginersut, saqqummiussami maluginiarpara qimmit qimuttut, aammalu Avannaata qimussersuartarneq pillugu ataatsimut saqqummiunneqartut. Inuit Ataqatigiinni illu isumaqarpugut pingaaruteqartoq qimmit qimuttut immikkut illorsorneqarnerat sammineqartussaasoq, aammalu Avannaata qimussersuartarneq immikkut aamma pitsaasumik eqqartorneqarsinnaasoq.

Qimusseq – qimussersoq qimminik akuneqanngitsunik qimuttulik kulturitsinnut – kikkuunitsinnut kinaasutsitsinnullu attuumassuteqarluinnaqqissarnini pissutigalugu uagutsinnut pingaaruteqartupilorujussuuvoq. Naggueqatittalu nalaataanik nalaataqassanngikkutta qimusseq qimminik akuneqanngitsunik qimuttulik eriagalugu paarilluaqqissaartariaqarparput.

Qimusseq qanga siulitta Inunnik taasimasut inuuniarnerannut pingaaruteqarluinnaqqissaartusimavoq pinngitsoorneqarsinnaanngitsoq; Qaannap saniatigut, qimusseq ukiorstuarmi takeqisumi angallataallunilu inuussutissarsiutaalluni piniutaalluartuusimavoq, ukiuni arlalinni qimmeq taanna qanittuaraallugu najortiguarsimasarput, ullumikkut suli piniartoqarfinni pinngitsoorneqarsinnaanngitsoq.

Naallu nunatta ilarujussuani qimusseq ullumikkut suli taamatut pingaarutilittut inissisimagaluartoq, pingaartumik avanersuarmi, nunaqarfinni, piniartoqarfinni aalisartoqarfinnilu, taamattoq ullumikkut pingaarutaa qangatut ikkunnaariartulersimasutut oqaatigineqartariaqarpoq.

Naluneqanngitsutut ullumikkut qimusseq unammillertinik ulikkaarpoq, unammilertit aamakorsuit: Umiarsuit, aquuteralaat, kilisaatit, snescooterillu, ipad, pinnguaatit atortorissaarutillu nutaaliaasut assigiinngitsorpassuit.

Atortorissaarutilli nutaalialasut saniatigut aammattaaq nalunngilarput silaannaap allangngoriartornera – tassalu silap kissakkaluttuinnarnera qimmimik qimuttumik atuisinnaanermik killiliisut unammillertitut taaneqarsinnaalersimasut ilagilluinnalersimavaat.

Tamanna pillugu Inuit Ataqatigiinniit kommunit kalaallit qimmiinik qimmeqarfiusut kaammattorusuppagut kalallit qimmitta ulluinnarni atugarisaannik pitsanngorsaataasinnaasunik piaartumik iliuuseqarniaqqullugit, qimmillu illoqarfiup avataanut inissinneqartalernissannik aalajangersimanerminnik eqqarsaqqilaqqullugit.

Taamatulli oqariarluta pinngitsoorusunngilagut aamma qimusseruaqartarneq pillugu oqaaseqalaassalluta; qimusseruaqartarneq ajunngilluinnarpoq, isumaq immini ajunngilluinnarpoq aamma kattuffiup tamanna nammineq oqartussaaffigaa akisussaaffigaalu. Isumaqarpugullu aningaasaliiffigineqartarnera pitsaasumik aaqqiiffigineqassappat susassaqartut oqaloqatigiilluartariaqartut., Inut Ataqatigiinniit saqqummiussaq pingaaruteqartoq qimmit qimuttut illersorneqarnera pillugu immikkut sammineqarnissaa; aammalu Avannaata qimusseruaqartarnera pillugu ataatsimiititaliami immikkut pitsaasumillu peqqissaartumillu suliarineqarnissaa innersuussutigaarput.

Qujanaq.